


Taku Papa Hūpekepeke

nā Karyn Paringatai

Atakura

He Whakatau

Me mātua pānui kia marama rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. Kei te pīrangi a Te Puāwai ki te pekepeke i runga i te papa hūpekepeke i ngā wā katoa. Ka mutu ia ki te aha?

He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Kōrerotia ētahi mea tino pai ki te ākonga ki te mahi.

Kōrerotia te pai o te pekepeke i runga i tētahi papa hūpekepeke. He pai taua mahi ki te ākonga?

Ka aha pea te ākonga mēnā ka tonoa ia ki te whakamutu me te tahuri ki te mahi i ētahi mahi o te kāinga?

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e marama ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini rīpene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te mahi pai ki a Te Puāwai?
2. Ka tonoa ia e tōna whānau ki te aha?
3. Ko te aha tāna whakautu?
4. He aha ōu whakaaro mō te whakautu a Te Puāwai, arā “Kāo!”?
5. He aha ōu whakaaro mō te āhua i mutu ai te kōrero?

Ngā whakautu ki ngā whakapuaki māramatanga

1. He pai ki a ia te pekepeke i runga i tāna papa hūpekepeke.
2. Haere ki te whakapai i tōna rūma, ki te whāngai i tana ngeru, ā, ki te tiki i ngā reta.
3. “Kāo! Kei te pekepeke ahau.”
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T He āta titiro, he tautuhi i ngā āhua whakawhiti kōrerorero mai i te pukapuka.

He whakatakinga ā-roro, he whakaharatau

I mua i te pānui i te pukapuka, matapakia ka aha pea ngā whakaaro o te ākonga ki te mahi ia i tētahi mahi tino pai ki a ia, ā, ka tonoa ia ki te whakamutu me te mahi i tētahi atu mahi.

Kia oti i te ākonga te pukapuka te pānui, titiro anō ki ngā whakautu a Te Puāwai. He tika te whakautu “Kāo”? He aha ai, he aha i kore ai rānei?

He aha ētahi take pea i whakamahi ai te kaituhi i te kōrero arorangi? Ka pēhea e rerekē ai ki te tuhi hei mahi whakaari kē?

Kōrerotia ngā mahi peke o te ao Māori i neherā, arā, te tākaro tūpeke, te kairērere me te tūtoko. Ka pai aua tākaro ki te ākonga?